



FACTVM

*Du proces d'entre Damoiselle Margueritte Charpentier femme separee
quant aux biens de noble homme Bertrand le Picart, intimee.*

Contre M. Thomas Dreux Greffier du conseil priué, appellant.

LE fait est que ledict M. Thomas Dreux est creancier dudit sieur le Picart mary de ladicte Damoiselle *idque*, de la somme de mil escus prouenant de ce qu'un nommé la Londe ayant jouié au trictrac contre ledict le Picart, luy ayant gagné ladicte somme en deux cedulles, ledict sieur Dreux auroit achepté dudit la Londe à vil prix lesdictes deux obligations, & moyennant peu de chose qu'il auroit encore baillé, il auroit tiré dudit le Picart vne obligation de ladicte somme, dont appert par les cedulles & obligations produictes au proces, lesquelles reuiennent à la somme totale. Ledit sieur Dreux n'ayant oncques presté vn liard audit le Picart pour auoir causé ladicte obligation à cause de prest.

Pour estre payé de ceste obligation ledict sieur Dreux auroit fait saisir tous les meubles qu'il auroit trouuez estre dans la maison de l'intimee: à laquelle saisie l'intimee s'estant opposee, l'appelant auroit tiré ladicte opposition au Conseil.

Pendant que ceste opposition se poursuioit, d'autant que le principal moyen de l'intimee estoit vne sentence de separation de biens, l'appelant en ayant eu communication en interjetter appel en vne audience, duquel estant tenu pour releué & les parties reglees à escrire & produire lors de l'institution du proces, l'appelât auroit présenté vne infinité de requestes, recherché l'origine de l'intimee, demandé qu'elle representast le contract de son premier mariage, & vouloit par telle poursuite, mesmes par l'interrogatoire de l'intimee chercher des preuues pour soustenir son appel.

Enfin apres tant de longueurs l'intimee ayant iustifié que toutes les formes requises pour la vallidité d'une separation auroient esté gardee, & que la separatiō auroit esté effectuee ainsi que l'on pourroit desirer, arrest seroit interuenu du par lequel ceste sentence de separation auroit esté confirmee: & combien que cest arrest d'eust auoir mis fin au proces, toutesfois il aduint que l'appelant doubtant fort de la cause lors du iugement du proces, auroit présenté vne requeste dont l'intimee n'auroit eu aucune communication, par laquelle il auroit exposé que les meubles qu'il auoit fait saisir n'appartenoient point à l'intimee, ains à son mary, mettant en fait qu'ils auoient esté acheptez des deniers de son mary.

A



Ceste requeste auroit esté cause que le reste du proces seroit demeuré à iuger, & que sur la diuersité des oppinions il auroit esté party, non point sur la totalité des biens saisis *quod notandum*, mais seulement sur le faict de certaine tapisserie y mentionnee, & d'un certain liët de Damas, pour le surplus desdicts meubles qui estoient en plus grande quantité & de plus de valeur, ensemble de tous les immeubles, main-leuee ayant esté faicte purement & simplement à l'intimee.

Les opinions diuerfes sont. La premiere du rapporteur du proces que main-leuee pure & simple est faicte à l'intimee de tous ses meubles en general. La seconde, que les parties doibuent estre appoinctees contraires sur le faict que lesdictes tapisseries & liët ont esté acheptez des deniers dudit le Picart mary.

Mais le Conseil peut voir le peu d'apparence qu'il y auroit de receuoir ce faict & l'inconueniant qui en suruiendrait. Premièrement, la sentence de separation estant effectuee & confirmee, il faut que ceste sentence aye quelque effect, lequel n'est autre sinon que la communauté estant dissolüe *vnusquisque sibi suas res haberet*. En sorte que l'un n'est tenu des debtes de l'autre, & le mary n'est plus maistre des meubles, d'où vient que n'estant plus maistre des meubles, on ne peut par presumption prendre les meubles comme appartenans à luy: mais il faut vne certitude, laquelle ne peut estre quand ils sont trouuez en la possession des deux pouuant aussi tost appartenir à l'un qu'à l'autre.

D'où vient que ny ayant aucune presumption, il faut venir à la preuue certaine, laquelle venant à defaillir, c'est vne vexation de vouloir passer plus auant.

Or est il que ceste preuue defaut à l'appellant en ce faict, d'autant que par le proces l'intimee le renuerse par vn faict tout contraire veriffié par escript: sçauoir que lesdicts meubles luy appartiennent produisant les quittances des payemens qu'elle a faits en les acheptant, qui est vne fin de non recepuoir tres-pertinente contre tel faict, sur lequel la partie mesme ne seroit point tenue de respondre suiuant la doctrine de Barthole sur la loy *In contractibus cod. de non. nume. pecu.* l'Ordonnance mesmes n'ayant voulu permettre telle preuue de tesmoings contre vne preuue par escript: preuue qui ne sçauroit estre plus forte, d'autant que par le moyen de telles quittances l'on voit la propriété de la chose auoir esté transferee en la personne de l'intimee, *quia traditionibus rerum Domina transferuntur*.

Et ce moyen n'est point seulement de l'Ordonnance, mais il est assisté de la disposition du droit. Car estant seulement question en ce proces de la propriété des meubles, les Empereurs disent en la loy *Multum interest cod. si quis alteris vel sibi: In domini questione illum posteriorem haberi, cui possessio à Domino tradita est*. Si bié que les meubles ayans esté baillez à l'intimee comme il appert par les quittances qu'elle en produit, la propriété luy appartient, laquelle par vn faict ne peut estre ostee. Qui faict que la main-leuee doit estre baillee purement & simplement à l'intimee.

Et ceste possession qui est baillee par le propriétaire de la chose, rend

tellement le possesseur propriétaire, que mesme vn pere de famille ayant acquis quelque chose pour son fils qui est en sa puissance, encores que *non filio sed sibi acquirat*, & par ainsi que ceste acquisition semble estre nulle pour le regard du fils. Toutesfois *si emancipato filio pater tradat conualescit emptio*, & le fils par ceste possession est rendu maistre & propriétaire de la chose, *l. siue possid. cod. de probat.*

Au faict qui se presente l'intimee est en plus forts termes, l'intimee ayant achepté elle-mesme, non poinct *alteri*, *sit sibi*, & la possession luy ayant esté baillée par les propriétaires, & s'il se faut regler par la generalle disposition du droit il est certain *quæ in questione proprietatis non quaritur unde pecunia, nec à quo sed tantum cuius nomine & cui possessio tradita sit l. multum interest & l. i. cod. si quis alteri vel sibi ex aliqua*, la chose estant reputée propre à celluy a qui elle auroit esté baillée, c'est encores la decision formelle de la loy & *si de tua cod. ex donat. int. vir. & vx.* cas tout semblable de celluy dont est a present question, d'autant que le mary ayant achepté vn seruiteur au nom de sa femme encores que ce fust de son argent; toutesfois la loy dict *si ei tradita sunt mancipia eorum Dominium non ad te*, parlant du mary *sed ad eam pertinere*. Toute presumption de fraude cessant nonobstant la coniunction des personnes & l'identité y estant paree que en droit escript, n'y ayant point de communauté, c'estoit de mesmes qu'à present quand il y a separation de biens.

Il est donc vray de dire que de mettre en faict les meubles auoir esté acheptez de l'argent dudit le Picart ayans estez liurez à l'intimee, que c'est mal à propos, *si quidem huiusmodi licet probetur factum tamen inde rationi nullum præbet adminiculum*. Comme parle l'Empereur en la loy *ad probationem, cod. de probat.*

Et le Conseil à prejugé *imò*, juge ceste cause au faict qui se presente, d'autant qu'il ny auoit point plus de raison pourquoy la mainleuee estoit baillée tant des immeubles que de partie des meubles, l'autre partie demeurant subiecte au faict mis en auant par l'appelant, lequel faict, alloit à la totalité des meubles, aussi peu receuable pour l'un, que pour l'autre. Et toutesfois le Conseil par cest arrest à baillé main-leuee des immeubles & de la plus grande partie des meubles.

La principale raison pourquoy le Conseil n'auroit voulu recepuoir ce faict est, que tout faict mis en auant estant general & non circonstancié des circonstances du temps, du lieu & autres qui peuuent seruir à la preuue, n'est point recepuable pour en faire preuue, comme au faict qui se presente que l'on dict en general, les meubles auoir esté acheptez de l'argent du mary de l'intimee, ne disant point quant cest argent auroit esté baillé, en quel lieu, & en qu'elles especes. Ce faict ainsi generally posé n'est receuable, comme inuenté plustost pour reculler le iugement d'un proces, que non point pour verité qu'il y ait, n'estant à presumer que s'il estoit veritable on eust obmis d'y adjoûter quelqu'une de telles circonstances.

Le dernier moyen est la consequence, que si vn tel faict ainsi generally posé estoit receu, l'intimee qui est chargée de quatre petits enfans,

& presque du cinquiesme, seroit perpetuellement en proces, les creanciers de son mary qui sont en fort grand nombre, la poursuivant tous les iours, & mettant vn pareil faict en auant pour auoir des appointemens de contraires, qui seroit sa totalle ruine pour les grands fraiz qu'il conuiendroir faire, lesquels elle ne pourroit non plus esperer de recours, qu'elle en a contre l'appellant, qui n'est point condamné aux despens. Le seul remede à ce malheur estant de ne point faire ceste ouuerture par l'appointement de contraires contre les quictances en ce qui concerne la tapisserie & contre la notoriété pour le liét, qui est que chacun sçait le liét auoir esté faict en la maison de l'intimee, comme mesme l'appellant demeure d'accord, imò des mains propres de ladicte intimee.

Le 26^{me} j^un 1604 by p^{re}sente f^uit departy M^r. Cantre
Rap^{re}sentat^{re} caligre Comparil^{re} ou^{re} f^uit d^ume^{re} anoy
f^uynam lo^{re} p^{re}my en l'af^{re}

